



Ni Presidente  
Thomas S. Monson

# Ti Lumba ti Biag

*Sadino ti naggapuantayo? Apay nga addatayo ditoy? Sadino ti papanantayo kalpasan daytoy a biag? Saan nga agtalinaed nga awan sungbatna dagitoy a saludsod ti sangalubongan.*

**K**akabsatko a lallaki ken babbai, ita a bigat tarigagayak ti agsarita kadakayo maipapan kadagiti agnanayon a kinapudno—dagita a kinapudno a mangpabaknangto iti biagtayo ken mangkita kadatayo nga agawid a sitatalged.

Iti amin a lugar agdardaras dagiti tao. Agitayab dagiti eroplano kadagiti napapateg a tao a nakalugan kadagitoy nga iballasiw kadagiti kontinente ken kadagiti dadakkel a taaw tapno makadar-ay kadagiti miting iti negosio, maipatungpal ti obligasion, makapagbakasion, wenno makabisita kadagiti kapamilya. Dagiti kalsada iti amin a lugar—agraman dagiti freeway, thruway, and motorway—ket pangpagnaan ti minilmilion a lugan ti minilmilion a tattao, iti kasla awan sardayna a panagayus gapu iti nadumaduma nga adu a rason bayat ti panagdardarastayo kadagiti aramid-tayo iti tunggal aldaw.

Iti daytoy nakaal-alisto a pangagandang ti biag, agsardengtayo kadi tapno agutob—uray kadagiti awan patinggana a kinapudno?

No idiligtayo kadagiti agnanayon a

kinapudno, kaaduan kadagiti saludsod ken pakaseknan ti inaldaw a panagbiag ket talaga nga awan pategna. Ania ti nasken a pangmalemtayo? Ania ti maris a nasken nga ipintatayo iti salastayo? Nasken kadi nga isalip-tayo ni Johnny iti soccer? Dagitoy a saludsod ken adu a dadduma pay a maipada kadagitoy ket mapukaw ti pategda no panawen ti krisis, no madangran wenno masugatan dagiti ipatpateg, no adda agsakit iti balay, no agsakit iti nakaro ken asidegen a matay ti maysa a tao. Lumawlawag ti kapanunotantayo, no maikeddengtayo no ania a talaga ti napateg ken no ania ti awan pategna.

Itay kallabes sinarungkarak ti maysa a babai a nasurok a dua a tawenen a makibakbakal iti sakit a makapatay. Imbagana a sakbay a nagsakit, adu dagiti ar-aramidenna iti inaldaw kas iti panagdalus a naimbag iti balayna ken panangpunno iti daytoy kadagiti napipintas ken nangingina nga alikamen. Mamindua iti maysa a lawas kano nga agpaurnos iti buokna ken aggastos iti adu a kuarta ken panawen iti tunggal bulan

iti panagatang kadagiti kawesna. Manmano nga awisenna a sumarungkar dagiti appokona, gapu ta kanayon a pagdandanaganna ta amangan no mabuong wenno madadaelda dagiti napapateg ken nangingina a sanikuana.

Ket kalpsanna naawatna ti nakakakigtot ken makapaliday a damag nga agpeggaden ti biagna ken amangan ta saanen nga agbayag pay ti biagna. Kinunana nga iti kanito a nangngegna ti diagnosis ti doktor, naamirisna ti dadduma pay a napapateg a banag ti biagna ket naammuanna a dagus a mabubosna ti nabati pay a panawen ti biagna iti sidong ti pamilia ken gagayyemna ken maipamaysana ti biagna iti ebanghelio, gapu ta dagitoy ti kapatgan kenkuana.

Dumteng kadatayo amin dagiti kasta a kanito ti pannakalawlawag iti ania man nga oras ngem nalabit a saan a kanayon nga iti makaawis rikna a kasasaad. Makitatayo a silalawag no ania a talaga ti kapatgan iti biagtayo ken no kasano ti nasken a panagbiagtayo.

Kinuna ti Mangisalaklan:

“Saankayo nga agurnong kadagiti gupgupit nga agpaay kadakayo ditoy daga, isu a ti sanga ken ti lati dadaelenda ida, ken isu a dagiti mannana-kaw kalienda ket takawenda:

“Ngem agurnongkayo kadagiti gupgupit sadi langit, isu a ti sanga ken ti lati dida a dadaelen, ken isu a dagiti mannanakaw dida kalien ken takawen:

“Ta no adino ti yan ti gupityo, addanto met idiaiy ti pusoyo.”<sup>1</sup>

Iti panawentayo iti nalau unay a panagutob wenno kangrunaan a panagkasapulan, dumanon ti kararua

ti tao iti langit, nga agdawdawat iti sungbat ti langit kadagiti kapapatgan a saludsod ti biag: *Sadino ti naggapuantayo? Apay nga addatayo ditoy? Sadino ti papanantayo kalpasan ti ipapanautayo iti daytoy a biag?*

Saan a matakuatan dagiti sungbat kadagito a saludsod iti uneg dagiti libro iti pagadalan wenno iti panagsukisok iti Internet. Nalablaves pay dagito a saludsod ngem iti mortalidad. Sakup daytoy ti kinaagnanayon.

*Sadino ti naggapuantayo?* Saan a maliklikan a panunoten daytoy a saludsod, no saan nga isao, ti tunggal tao.

Imbaga ni Apostol Pablo kadagiti taga Athens iti Mar's Hill a "datayo dagiti annak ti Dios."<sup>2</sup> Gapu ta ammo-tayo a dagiti bagitayo ket annak dagiti mortal a nagannaktayo, nasken a sukisokentayo ti kaipapanan ti insao ni Pablo. Impakdaar ti Apo a "ti espiritu ken ti bagi ti kararua ti tao."<sup>3</sup> Ngarud ti espiritu ti anak ti Dios. Ti mannurat iti Hebreo ket ibagana nga Isu "ti Ama dagiti espiritu."<sup>4</sup> Ti espiritu ti amin a tao ket literal nga "annakna a lallaki ken babbai."<sup>5</sup>

Maawatanmi a dagiti naparegta a mannaniw, tapno maadalmi daytoy a pagsasaritaan, ket insuratda dagiti makatignay a mensahe ken nairekord a makarimbaw a kapanunotan. Insurat ni William Wordsworth ti kinapudno:

*Ti pannakaipasngaytayo ket pannaturug ken pannakalipat:*

*Ti kararuatayo ket kasla iti Bituen, Sakbay pay a nayanaktayo, daytoy ket addan,*

*Ket adayo ti inna naggapuan:  
Saan a naan-anay a nalipatan,  
No di ketdi naan-anay a naisaganaan,*

*Naipasngaytayo amin a nasantuan*

*Manipud iti Dios, nga intay pangtaengan:*

*Kas maladaga asidegtayo iti kalangitan!*<sup>6</sup>

Utoben dagiti nagannak ti pagrebbenganda a mangisuro, mangparegta, ken mangted pannarabay,

pangiturong, ken pagwadan. Ken kabayatan ti panangutob dagiti nagannak, dagiti annak—ken nangnangruna kadagiti agtutubo—agdamagda iti napateg a saludsod, apay nga addatayo ditoy? Gagangay a maisao daytoy a siuulimek iti kararua ket madamag iti kastoy, apay nga *addaak* ditoy?

Nasken nga agyamantayo a pinarsua ti masirib a Namarsua ti daga ket inkabilnatayo ditoy, nga adda pannakalipattayo maipapan iti immuna a panagbiagtayo tapno mapadasantayo ti panawen ti pannakasubok, ti gundaway a masubok ti bagbagitayo tapno maikaritayo iti amin nga insaganan ti Dios nga awatentayo.

Silalawag, maysa a kangrunaan a panggep ti yaaytayo iti daga ket tapno manggun-od iti bagi a nagtagilasag ken nagtagitulang. Naikkan-tayo pay iti sagut ti kinawaya nga agpili. Iti nakaad-adu a wagas, adda pribilehiotayo nga agpili para iti bagbagitayo. Ditoy a masursurotayo manipud kadagiti narigat a padas ti biag. Mariknantayo ti nasayaat ken dakes. Mapaggidiattayo ti napait ken ti nasam-it. Matakuantantayo nga adda dagiti bunga dagiti aramidtayo.

Babaen ti panagtungpaltayo kadagiti bilin ti Dios, mabalin a maikaritayo iti dayta a "balay" nga insao ni Jesus idi impakdaarna: "Idiay balay ni Amak, adda adu a pagianan . . . innak isaganaankayo iti pagianan . . . tapno no adino ti yanko, addakay met koma."<sup>7</sup>

Nupay "naipasngaytayo a nasantuan" iti mortalidad, awan sarday nga agtultuloy ti panangbiag. Agbalin nga agtutubo ti ubing, ket saan a madmadlaw ti panagbaket wenno panaglakayna. Manipud kadagiti padastayo masursurotayo ti dumawat iti tulong ti langit kabayatan ti panagdaliasattayo iti dalan ti biag.

Minarkaan ti Dios, nga Amatayo, ken ni Jesucristo, nga Apotayo, ti dalan nga agturong iti kinaan-anay wenno kinaawan pagkurangan. Aw-awagandatayo a mangsurot kadagiti agnanayon a kinapudno

ken agbalintayo nga awan pagkuranganna, kas Kadakuada nga awan pagkuranganna.<sup>8</sup>

Impada ni Apostol Pablo ti biag iti maysa a lumba ti panangtaray. Kadagiti Hebreo inyallukoyna, "Iwagsaktayo . . . ti basol a manglawlaw a silalaka kadatayo, ket tarayentayo koma a siaanus ti tarayen a naikabil iti sanguanantayo."<sup>9</sup>

Iti kinaganetgettayo, ditay koma liplipatan ti napintas a balakad manipud iti Eclesiastes: "Ti lumba saan nga agpaay kadagiti nasiglat, wenno ti bakal kadagiti napigsa."<sup>10</sup> Kinapudnona, agpaay ti gunggona kenkuana nga agibtur agingga iti panungpalan.

No pampanunotek ti lumba ti biag, mapanunotko ti maysa pay a kita ti lumba, uray manipud idi ubingak pay. Agal-alakami nga aggagayyem iti lanseta, ket manipud iti nalukneng a kayo ti maysa a kayo a willow, agar-aramidkami iti babassit a sinan-bangka. No maikkanen iti trayanggulo a layag ti sinan-bangka, ipuesto ti tunggal maysa ti sinan-bangkana tapno aglilinnumba iti naallon a Provo River ti Utah. Tumaraykami no kua iti igid ti karayan ket buybuyanenmi dagiti babassit a bangka a no dadduma lumned ken lumtawda iti naapres nga ayus ket no dadduma natalna nga aglayag dagitoy bayat ti panagadalem ti danum.

Iti maysa a lumba dagiti sinan-bangka nakitami nga adda maysa a bangka nga umun-una iti amin a mapan iti finish line. Dagus nga inyanud daytoy ti allon nga asideg unay iti dakkell nga alinuno, ket nagirig ti bangka ket napakleb. Nayanod daytoy nga agpulpuligos, ket saanen a makasubli pay iti dalan ti ayus. Iti kamaudiananna nagsardeng daytoy iti tengnga dagiti dadael a barko ken kargamento a naipalawlaw ditoy, ket naisadsad kadagiti berde a lumot.

Dagiti sinan-bangka idi ubingak pay ket awanan iti landok a pangpaitibker, awanan iti timon a mangted iti direksion, ken awan iti pagtaudan ti bileg. Saanda a mapengdan a dagiti

pagturinganda ket agpababa—ti dalan a saanen a malabanan.

Saan a kas kadagiti sinan-bangka, naipaayantayo kadagiti nadiosan a kababalin a mangiwanwan iti panagdaliasattayo. Sumrektayo iti mortal a biagtayo saan a tapno agpaanod kadagiti ayus ti biag no di ketdi addaan iti kabaelan nga agpanunot, manggeddeng, ken agballigi.

Saannatayo a pinaumay ditoy ti Nailangitan nga Amatayo iti awan inggana a panagdaliasattayo a saan a mangipapaay ti pamuspusan tapno maawattayo manipud Kenkuana ti tarabay a mangipanamna iti natalged a panagsublittayo. Ti ibagbagak ket kararag. Ibagbagak pay dagiti arasaas manipud iti dayta naalumamay, bassit a timek; ken diak maliwatan dagiti nasantuan a kasuratan, a naglaon iti balikas ti Apo ken dagiti balikas dagiti propeta—a naited kadatayo tapno makatulong kadatayo nga agballigi a makadanon iti finish line.

Iti sumagmamano a panawen ti mortal a misiontayo, nakariknatayo iti panagduadua, panagtamnay ti isem, saem ti sakit—kasta met ti pannakalpas ti kinaagtutubo, panagpuraw ti buok, panagbaket ken panaglakay, ken ipapatay.

Damagen ti tunggal managpanunot a tao iti bagina ti saludsod nga imbaga ni Job idi un-unana: “No matay ti tao, agbiagto aya manen?”<sup>11</sup> Padasentay man nga iwaksi iti panunottayo dayta a saludsod, kanayon latta nga agsubli. Dumteng ti patay iti amin a sangkatawan. Dumteng daytoy kadagiti babbaket ken lallakay no mabayagdan a magna. Ti panagawag daytoy ket mangngegan dagiti dumani saan a makagteng iti katengngaan ti panagdaliasat iti biag. No dadduma, daytoy ti mangpasar-deng iti katawa dagiti babassit nga ubbing.

Ngem adda kadi biag kalpasan ti ipapatay? Ipatatay kadi ti gibus ti amin? Binatikos ti Robert Blatchford, iti librona a *God and my Neighbor*, ti panamati dagiti Kristiano maipapan iti Dios, ken ni Cristo, maipapan iti

kararag, ken nangnangruna pay iti maipapan iti imortalidad. Situtered nga imbagana a ti patay ket kanibusanan ti panagbiagtayo ket awan ti asino man a makapagpaneknek nga adda biag kalpasan ti ipapatay. Kalpasaanna adda napasamak a makapakellaat. Kellaat a nagbalin a kasla tapok ti kaawan pammatina. Nabati isuna nga agmaymaysa ken awan gawayna. In-inut a nagsubli iti pammati a binatikos ken tinallikudanna. Ania ti dakkel a namagbalbaliw iti panniriganna? Pimmusay ti asawana. Silaladingit ti pusona a napan iti siled a nakaimas-sayagan ti natay a bagina. Minatmanna manen ti rupa ti ay-ayatenna unay. Iti iruruarna iti siled, kinunana iti maysa a gayyem. “Isu daydiay, ngem kasla saan nga isu. Kasla nagbalbaliw ti amin. Maysa a banag nga adda idiy ti naala kenkuana. Saanen nga isu daydi. Ania ti naawan no saan a ti kararua?”

Idi agangay insuratna: “Ti patay ket saan a kas iti pampanunoten dagiti tao. Daytoy ket kasla iti iseserrek laeng iti sabali pay a siled. It dayta sabali pay a siled makitatayonto . . . dagiti patpatgentayo a babbai ken lallaki ken makaay-ayo nga ubbing nga inayat ken napukawtayo.”<sup>12</sup>

Kakabsatko, ammotayo nga awan paggibusan ti ipapatay. Daytoy a kinapudno ket insuron dagiti sibi-biag a propeta iti amin a panawen. Masarakan pay daytoy kadagiti nasantuan a kasuratan. Iti Libro ni Mormon mabasatayo dagiti naipangruna ken makaliwliwa a balikas:

“Ita, maipapan iti kasasaad ti kararua, iti nagbaetan ti patay ken pangungar—Adtoy, naipakaammo kaniak babaen ti anghel, a dagiti espiritu ti amin a tao, apaman a suminada manipud iti daytoy nainlasagan a bagi, wen, ti espiritu ti amin a tao, nasayaat man wenno dakes, maipanda iti balay ti Dios a nangted iti biagda.

“Ket mapasamakto a maawat dagiti espiritu dagiti nalinteg iti kasasaad ti kinaragsak, A maawagan iti paraiso, ti panaginana a kasasaad, a paginanaanda iti amin a parikutda

ken amin a panagdandanag, ken panagleddaang.”<sup>13</sup>

Kalpasan a nailansa iti krus ti Mangisalakken ken naipaidda iti tanem iti uneg ti tallo nga aldaw, simrek manen ti espiritu. Naitulid ti bato ti tanem, ket rimmuar ti nagungar a Mannubbot, a nakakawes iti imortal a bagi a nagtagilasag ken nagtagitulang.

Dimteng ti sungbat iti saludsod ni Job, “No matay ti tao, agbiagto aya manen?” idi inasitgan ni Maria ken dagiti dadduma pay ti tanem ket nakitada ti dua a lallaki nga agrimirimat dagiti kawesda a nakisarita kadakuada: “Apay-apay a sapulenyok kadagiti natay dagiti sibibiag? Awan ditoy, no di ket nagungaren.”<sup>14</sup>

Kas bunga ti balligi ni Cristo iti tanem, agungartayonto. Daytoy ti pannakasubbot ti kararua. Insurat ni Pablo: “Adda met bagbagi a nailangitan, ken bagbagi a naindagaan: ngem maysa ti dayag dagiti nailangitan, ket sabali ti dayag dagiti naindagaan.”<sup>15</sup>

Celestial a gloria ti sapsapulentayo. Iti sidong ti Dios ti tartarigagayantayo a pagindegan. Agnanayon a pamilia ti kayattayo a pagkamengan. Maragpat dagiti kasta a bendision babaen ti tungpal biag a panagkagumaan, panagsapsapul, panagbabawi, ken iti kamaudianan panagballigi.

*Sadino ti naggapuantayo? Apay nga addatayo ditoy? Sadino ti panamantayo kalpasan daytoy a biag?* Saan nga agtalinaed nga awan sungbatna dagitoy a saludsod ti sangalubongan. Manipud iti kaunggan ti kararuak ken addaanak iti naan-anay a panagpakumbaba, paneknekak nga agpaypayso dagiti banag nga insaok.

Masarakan ti Nailangitan nga Amatayo kadagiti agtungtungpal kadagiti bilinna. Maseknan iti napukaw nga ubing, iti nasadut a barito wenno balasitang, iti nayaw-awan nga agtutubo, iti managbaybay-a a nagannak. Sidudungngo a makisao ti Maestro kadagitoy ken kasta met iti amin: “Agsublikayo. Umasidegkayo. Sumrekkayo. Agawidkayo. Umasidegkayo kaniak.”

Iti maysa a lawas, rambakantayo ti Paskua ti Panagungar. Maipamaysanto dagiti panunottayo iti biag ti Mangisalakana, iti ipapatayna, ken iti Panagungarna. Kas naisangsangayan a saksi, paneknekak kadakayo nga isu ket Sibibiag ken ur-urayenna ti naballigian a panagsublitayo. Sapay koma ta agballigitayonto a sumrek, ti napakumbaba nga ikararagko iti nasantuan a naganna—kas ken ni Jesucristo, ti Mangisalakantayo ken Mannubbottayo, amen.

**DAGITI NAGADAWAN**

1. Mateo 6:19–21.
2. Dagiti Aramid 17:29.
3. Doktrina ken Katulagan 88:15.
4. Hebreo 12:9.
5. Doktrina ken Katulagan 76:24.
6. William Wordsworth, *Ode: Intimations of Immortality from Recollections of Early Childhood* (1884), 23–24.
7. Juan 14:2–3.
8. Kitaen iti Mateo 5:48; 3 Nephi 12:48.
9. Hebreo 12:1.
10. Eclesiastes 9:11.
11. Job 14:14.
12. Kitaen iti Robert Blatchford, *More Things in Heaven and Earth: Adventures in Quest of a Soul* (1925), 11.
13. Alma 40:11–12.
14. Lucas 24:5–6.
15. 1 Taqa Corinto 15:40.

# Dagiti Pannursuro para iti Panawentayo

**D**agiti adalen iti Melchizedek Priesthood ken Relief Society kadagiti maikapat a Domingo ket maisangratto iti “Dagiti Pannursuro para iti Panawentayo.” Mabalin nga isagana ti tunggal adalen manipud iti maysa wenno ad-adu pay a bitla a naited iti kallabes unay a sapsap a komperensia (kitaen iti tsart iti baba). Mabalin dagiti stake ken district president ti pumili no ania kadagiti bitla ti nasken a mausar, wenno mabalinda nga idutok ti pagreb-bengan kadagiti bishop wenno branch president. Nasken a unay-unay dagiti dadaulo ti kinapateg dagiti kakabsat iti Melchizedek Priesthood ken kakabsat iti Relief Society a mangad-adal kadagiti isu met la a bitla kadagiti isu met la a Domingo.

Dagiti dumardar-ay kadagiti adalen iti maikapat a Domingo ket maallukoy nga agadal ken mangitugot iti klase ti kaudian nga isyu ti magasin iti sapsap a komperensia.

**Dagiti Singasing para iti Panangisagana iti Adalen manipud kadagiti Bitla**

Agkararagka tapno kaduaen-naka ti Espiritu Santo kabayatan ti panagadal ken panangisuro (kadagiti) bitla. Mabalin a masulisogka a mangisagana iti adalen nga

usarem dagiti dadduma a material, ngem dagiti bitla iti komperensia ti naanamongan a kurikulum. Ti naituding nga aramidem ket mangtulong kadagiti dadduma nga agsursuro ken agtungpal iti ebanghelio kas naisuro iti kallabes unay a sapsap a komperensia ti Simbaan.


Subliem nga adalen (dagiti) bitla, a sapulem dagiti pagbatayan ken doktrina a mangipaay kadagiti kasapulan dagiti miembro ti klase. Kasta met a sapulem dagiti estoria, reperensia ti nasantuan a kasuratan, ken palawag manipud (kadagiti) bitla a makatulongto kenka a mangisuro kadagitoy a kinapudno.

Agaramidka iti maysa a balabala [outline] ti no kasano ti panangisuro kadagitoy a pagbatayan ken doktrina. Ibilangmo ti panangiraman kadagiti saludsod a mangtulong kadagiti miembro ti klase:

- Mangsapul kadagiti pagbatayan ken doktrina [kadagiti] bitla.
- Mangpanunot maipapan iti kaipapananda.
- Mangiburay iti pannakaawat, kadagiti kapanunotan, padas, ken pammaneknek.
- Mangyaplikar kadagitoy a pagbatayan ken doktrina iti panagbiagda.

DAGITI BULAN DAGITI ADALEN NGA ISURO	DAGITI MATERIAL NGA ADALEN ITI MAIKAPAT-A-DOMINGO
Abril 2012–Oktubre 2012	Dagiti bitla a naited iti Abril 2012 sapsap a komperensia*
Oktubre 2012–Abril 2013	Dagiti bitla a naited iti Oktubre 2012 sapsap a komperensia*

\*Para kadagiti adalen iti maikapat a Domingo iti Abril ken Oktubre, mabalin a mapili (dagiti) bitla manipud kadagiti kallabes a komperensia wenno manipud iti kaudian a maysa. Sidadaan a magun-od dagitoy a bitla iti adu a lengguahe iti [conference.lds.org](http://conference.lds.org).



Ni Presidente Henry B. Eyring

Umuna a Mammagbaga iti Umuna a Panguluon

# Dagiti Bantay nga Ulien

*No adda pammatitayo ken ni Jesucristo, dagiti karigatan kasta met dagiti kalakaan a panawen iti biag ket mabalin a bendision.*

**N**angngegak ni Presidente Spencer W. Kimball, iti maysa a sesion ti komperensia, a nagkiddaw iti Dios nga ikkana koma kadagiti bantay nga ulienna. Kinunana: “Dadakkel dagiti karit a dumteng kadatayo, dadakkel dagiti gundaway a sanguentayo. Awatek dayta napintas a gundaway ket mariknak nga ibaga iti Apo, a sipapakumbaba, ‘Itedyo kaniak daytoy a bantay,’ itedyo kaniak dagitoy a karit.”<sup>1</sup>

Natignay ti pusok, gapu ta ammok ti sumagmamano a karit ken rigat ti napasaranan. Nariknak nga ad-adda a tinarigagayak ti agbalin a kas kenkuana, maingel a katulongan ti Dios. Isu nga iti maysa a rabii nagkararagak nga ikkannak iti maysa a pannubok tapno mapaneknekak ti kinaturedko. Malagipko pay laeng daytoy a silalawag. Idi dumteng ti rabii nagparintumengak iti katrek nga addaan iti pammati a dumani namaglipias iti pusok.

Iti uneg ti maysa wenno dua nga aldaw nasungbatan ti kararagko.

Nasdaaw ken napakumbabaak iti karigatan a pannubok ti biagko. Dua nga adal ti nasursurok. Umuna, nalawag a napaneknekak a dinengngeg ken sinungbatan ti Dios ti napammatian a kararagko. Ket maikadua, naammuak no apay a nariknak ti sibubukel a pammati iti dayta a rabii a dumteng ti naindaklan a bendision manipud iti panagrigat nga ad-adda pay ngem iti ania man a mapasamak.

Ti rigat a napadasak iti dayta nga aldaw ket kasla bassit no idilig kadagiti rigat a dimteng manipud pay idi—kaniak ken kadagiti ipatpattegko. Adu kadakayo itan ti mapadas kadagiti pannubok a pisikal, mental, ken emosional a mabalin a makaigapu ti panagsangityo kas iti napasamak iti maysa a naindaklan ken napudno a katulongan ti Dios nga am-ammok unay. Nanggegan ti narsna ti panagsangitna iti mapadpadasanna a sakit, “Inkarigatak ti agbalin a nasingpet iti unos ti biagko, apay a napasamak daytoy kaniak?”

Ammoyo no kasano a sinungbatan ti Apo dayta a saludsod para ken ni Propeta Joseph Smith iti kuartona iti pagbaludan:

Ket no maipisokkanto iti abut, wenno kadagiti ima dagiti mamma-patay, ket maipataw kenka ti patay; no maipuruakka iti uneg; ket no pagaambonandaka ti um-umkis a dalluyon; no agbalin a kabusormo ti narungot nga angin; no agdalungdong ti langit iti sipngat, ket amin a banag agkukunsabo a mangbangon iti dalanmo; ken kangrunaan ti amin no dagiti yo ti impierno ungapendanto ti ngiwatda a mangalun-on kenka, ammuem, anakko, nga amin dagitoy a banag ipaayandaka iti padas, ket agbalindanto a pagsayaatam.

“Ti Anak ti Tao bimmaba iti babaenda amin. Nain-indaklanka kadi ngem isu?”

“Ngarud, dika bumdeng, ket agtalinaedto kenka ti kinasaserdote; ta naitudingen ti beddengda, saandanto a makalabas. Ammon dagiti aldawmo, ket mabilbilangen dagiti tawenmo; ngarud, dika agbuteng iti aramiden ti tao, ta addanto kenka ti Dios iti agnayanon nga awan inggana.”<sup>2</sup>

Panangkunak awan ti napimpintas pay a sungbat iti saludsod no apay a dumteng dagiti pannubok ken no ania ti nasken nga aramidentayo ngem kadagiti balikas ti Apo Mismo, a nakapadas kadagiti pannubok para kadatayo a nakarkaro pay ngem iti mapanunottayo.

Malagipyo dagiti balikasna idi imbalakadna a, gapu iti pammatitayo Kenkuana, nasken nga agbabawitayo:

“Ngarud bilinenkayo nga agbabawi—agbabawikayo, no saan dangrangkayo babaen ti panaplit iti ngiwatko,

ken babaen ti pungtotko, ken babaen ti ungetko, ken nakaronto ti panagsagabayo—no kasano ti kakarona diyo ammo, no kasano ti kinain-inakana diyo ammo, wen no kasano ti kadagsen ti imetenyo diyo ammo.

“Ta adtoy, siak, a Dios, sinagabak dagitoy a banag para iti amin, tapno saanda koma nga agsabawida;

“Ngem no saanda nga agbabawi nasken nga agsababada a kas kaniak;

“A dayta a panagsagaba nangipaay kaniak, uray pay ti Dios, a kaindaklan iti amin, nga aggarigenggen gapu iti saem, ken agdara iti tunggal terereman, ken agsababada nga agpada ti bagi ken ti espiritu—ket kayatko a saanak koma nga uminum iti napait a kopa, ken kumsen—

“Nupay kasta, madaydayaw koma ti Ama, ket nakiranudak ken linepasko ti panangisaganak kadagiti annak ti tattao.”<sup>3</sup>

Mamatitayo a ti wagas tapno marambawantayo dagiti pannubok ket mamatitayo nga adda “balsamo idiai Galaad”<sup>4</sup> ken inkari ti Apo, “Dikanto . . . panawan.”<sup>5</sup> Dayta ti insuro kadatayo ni Presidente Thomas S. Monson a mangtulonga kadatayo ken dagiti pagserbiantayo nga addaan kadagiti naliday ken nadagsen a pannubok.<sup>6</sup>

Ngem nainsiriban nga insuro pay ni Presidente Monson a masapul a patibkeren a nasayaat ti pundasion ti pammati tapno magun-od dagita a bendision. Nalabit a nakitayon a kasapulan dayta a pundasion, kas kaniak, iti bangir ti katre ti maysa a tao a nakasagana a sumuko iti laban nga agibtur agingga iti panungpalan. No saan a natibker a naimula ti pundasion ti pammati iti puspusotayo, saantayo a makapagibtur.

Panggepko ita nga iladawan ti ammok no kasano a mabangontayo dayta saan a marebba a pundasion. Sipapakumbabaak a mangaramid iti daytoy para iti dua a gapu. Umuna, ti sawek ket mabalin a mangupay iti sumagmamano a marigatan iti baet ti dakkal a pannubok ken makarikna a marebberba ti pundasion ti

pammatida. Ken maikadua, ammok a makapadasak kadagiti nakaro a pannubok sakbay nga agibus ti biagko. Ngarud, ti ibalakadko kadakayo ket masapul a paneknekan ti bukodko a panagibtur agingga iti panungpalan.

Idi baroak, nagtrabahoak iti maysa a kontratista iti panagikabil iti footing ken pundasion para kadagiti baro a balay. Iti pudot ti init narigat nga isagana ti daga para iti porma wenno sukog a pangibukbokanmi iti semento para iti footing. Awan pay dagiti makinaria. Nagusarkami iti piko ken pala. Narigat ti agaramid kadagiti natibker a pundasion para kadagiti pasdek kadagidi a panawen.

Kasapulanna pay daytoy ti anus. Kalpasan a naibukbokmi ti semento iti footing, inuraymi daytoy a mamagaan. Kayatmi man a mayalisto ti trabaho, inuraymi pay a malpas a maibukbok ti semento para iti pundasion sakbay nga inikkatmi dagiti porma.

Ken ti ad-adda a makaawis iti maysa a baro a karpintero ket ti kasla narigat ken nabayag a panagikabil kadagiti landok a siaaannad iti uneg dagiti porma tapno mangpatibker iti pundasion.

Iti kasta met la a wagas, masapul nga isagana a nasayaat ti daga para iti pundasion ti pammatitayo tapno masarkedan dagiti bagyo a dumteng iti biag ti tunggal maysa. Ti natibker a batayan ti pundasion ti pammati ket ti bukod nga integridad.

No kanayon nga agpilitayo iti rumbeng iti kanito nga agpilitayo, tumibker ti pundasion ti pammatitayo. Mabalin a mangrugi daytoy iti kinabubing gapu ta naipasngay ti tunggal kararua nga addaan iti awan bayadna a sagut ti Espiritu ni Cristo. Babaen dayta nga Espiritu maammuantayo no nagaramiditayo iti rumbeng iti sango ti Dios ken no biddut ti naaramiditayo iti imatangna.

Dagita a pili, a gagangay a ginagasut, ket mangisagana iti pundasion a pakabangonan ti pasdek ti pammatitayo. Ti landok iti igid a nangibukbokan iti pammatitayo ket ti ebanghelio

ni Jesucristo, a kadua ti amin a katulagan, ordinansa ken pagbatayan daytoy.

Maysa kadagiti tulbek iti managibtur a pammati ket ti umisu a panangeddeng no umdas kadin ti kinapigsa daytoy. Isu a saanak a nalaing nga agkararag a nasapa unay iti biagko nga ikkannak kadagiti bantay nga ulien ken daddadakkal a pannubok.

Saan a madagdagus a tumibker ti pammati iti panaglabas ti panawen, no di agkasapulan daytoy iti umdas a panawen. Saan nga umdas ti panaglakay wenno panagbaket. Ti napasnek a panagserbi iti Dios ken kadagiti pada a tao iti amin a puso ken kararua ti mangpabalin iti pammaneknek iti kinapudno a natibker a naespirituan a pigsa.

Ita, tarigagayak nga allukoyen dagiti addaan iti nadadagsen a pannubok, a makarikna a kumapkasuten ti pammatida gapu ti idadarup dagiti pakarikutan. Ti parikut mismo ket mabalin a wagas a mangpapigsa ket iti kamaudiananna nakagun-od iti saan a maisin a pammati. Imbaga kadatayo ni Moroni, ti anak ni Mormon iti Libro ni Mormon, no kasano a matagikuatayo dayta a bendision. Insurona ti simple ken napintas a kinapudno a ti panagtignay nga addaan iti bassit a pammati ket mangipalubos iti Dios a mangpadakkal iti daytoy:

“Ket ita, siak, ni Moroni, adda ibagak maipanggep kadagitoy a banag; ipakitak iti lubong a bambanag ti pammati a mabalin a namnamaen ken saan a makita; gapuna, saanyo a balusingsingen gapu ta diyo makita, ta awan ti maawatyo a saksi agingga iti pannakasuot ti pammatiyo.

“Ta babaen ti pammati ti nagpakitaan ni Cristo kadagiti ammatayo, kalpasan ti ibabangonna iti tanem; ket saan a nagpakita kadakuada agingga a naaddaanda iti pammati kenkuana; gapuna nasken unay nga adda pammati dagiti dadduma kenkuana, ta saan a nagpakita iti lubong.

“Ngem nagpakita iti lubong gapu iti pammati dagiti tao, ket intan-okna

ti nagan ti Ama, ken nangisagana iti pamuspusan a mabalin a pakiranundan dagiti dadduma iti nailangitan a sagut, ta bareng no mangnamnamada kadagidiay banag a di makita.

“Gapuna, mabalinyo met ti maadaan iti namnama, ken makiranud iti sagut, no adda la ketdi pammatiyo.”<sup>7</sup>

Dayta a pammati a kapatgan ken nasken a saluadan ken usarenyo agingga a kabaelayo ket isu ti pammati ken ni Apo Jesucristo. Insuro ni Moroni ti bileg dayta a pammati iti kastoy: “Ket awan ti nagutugotda a milagro iti kaano man agingga a namatida; gapuna immuna pay a namatida iti Anak ti Dios.”<sup>8</sup>

Binisitak ti maysa a babai nga immawat iti milagro ti umdas a pigsa a mangibtur iti saan a nimannama a pannakapukaw babaen ti simple a panangulitna nga awan sardayna kadagiti balikas, “Ammok a Nabiag ti Mannubbotko.”<sup>9</sup> Dayta a pammati ken balikas ti pammaneknek ket adda pay laeng iti tengnga ti angep a nagpalidem ngem saan a nangpunas kadagiti lagip ti kinaubingna.

Nasdaawak idi naammuak a nama-kawan ti sabali pay a babai iti maysa a tao a nabayagen a nakabasel kenkuana. Nasdaawak ket sinaludsodko no apay a pinilina a pakawanen ket lipaten ti panangikuskuspilna iti uneg ti nakaad-adun a tawen.

Kinunana a siuulimek, “Daytoy ti karigatan a banag a naaramidkon, ngem ammok laeng a nasken nga aramidek daytoy. Isu nga inaramidko.” Ti pammatina a pakawanento ti Mangisalakan isuna no pinakawanna dagiti dadduma ket nangisagana kenkuana a pumusay a sitatalna ken addaan namnama sumagma-mano laeng a bulan kalpasan a pinakawanna ti saan nga agbababawi a kabusorna.

Sinaludsodna kaniak, “No addaakon idiay, kasanonto ti kasasaadko idiay langit?”

Ket kinunak, “Ti ammok laeng gapu iti nakitak a kabaalam a mamati ken mamakawan a daytoy ti agbalin a napintas a panagsublim.”

Adda pay maysa a panangallukoy kadagiti agpampanunot ita no umdasen ti pammatida ken ni Jesucristo tapno makapagibtur agingga iti panungpalan. Nagasatak a nakaamammo dagiti dadduma pay kadakayo a dumdumngeng ita idi naub-ubing-kayo pay, naregta, masirib ngem iti kaaduan iti lawlawyo, ngem piniliyo nga aramiden ti aramid ti Mangisalakan. Iti kinawadwadyo nakasarakayo kadagiti wagas a mangtulong ken mangaywan kadagiti tao a mabalin a saanyo koma nga inkankano wenno impateg gapu iti kasasaadyo iti biag.

No dumteng dagiti pannubok, addanto kadakayo ti pammati nga ibturanyo a naimbag dagitoy, nga addankayo a diyo madmadlaw no agtignaykayo a mayannurot iti natar-naw nga ayat ni Cristo, nga agser-serbi ken mangpakpakawan kadagiti dadduma kas iti aramiden koma ti Mangisalakan. Binangonyo ti pundasion ti pammati gapu ta nagayatkayo a kas iti panagayat ti Mangisalakan ken nagserbikayo para Kenkuana.

Saan pay a naladaw ti amin tapno pagpisaenyo ti pundasion ti pammati. Kanayon nga adda panawen. Babaen ti pammati iti Mangisalakan, makapagbabawikayo ken makadawat iti panmmakawan. Adda maysa a tao a mapakawanyo. Adda maysa a tao a mapagserbian ken maitag-ayyo. Maaramidyo daytoy sadino man ti yanyo ken kasano man ti kinaliday ken panagmaymaysayo.

Diak maikari nga aggibusen ti rigatyo iti daytoy a biag. Diak maipanamnama kadakayo a kasla saanto nga agbayag dagiti pannubokyo. Maysa kadagiti saguday ti pannubok iti biag ket ti kasla painnayadenna dagiti pagorasan ken kasla dumani agsardengen daytoy.

Adda dagiti gapu iti dayta. Iti pannakaammo kadagita a gapu ket mabalin a saan unayen a mangted iti pannakagin-awa, ngem makariknakayo iti panagitured. Naggapu dagita a gapu iti daytoy maysa a kinapudno:

iti naan-anay nga ayatda kadakayo, kayatdakayo nga aturen ti Nailangitan nga Ama ken ni Jesucristo tapno makadennayo Ida ken ti familiayo iti agnanayon. Dagiti tao a nadalusan a naan-anay laeng babaen ti Pannubbot ni Jesucristo ti makapan sadiay.

Nakilaban ni nanang iti sakit a kanser iti dumani 10 a tawen. Dagiti panagpaagas, ken panagpaoperar ken iti kamaudianan ti pannakaidalitna iti iddana ti sumagmamano kadagiti pannubokna.

Malagipko a kinuna ni tatangko kalpasan ti pannakakitana kenkuana idi magsatan ti maudi nga angesna, “Nagawiden ti maysa a bassit nga ubing tapno aginana.”

Maysa kadagiti nagsarita iti pumponna ni President Spencer W. Kimball. Kadagiti pammadayaw nga insawangna adda maysa a nalagipko a kasla kastoy ti pannakaisaona: “Mabalin a nalagip ti sumagmamano kadakayo a nagsagaba iti napaut ken nakaro ni Mildred gapu ta adda bid-dut nga inaramidna a nagkasapulan kadagiti pannubok.” Kalpasanna kinunana, “Saan, kinayat laeng ti Dios a mapatarnaw pay isuna iti ad-adda pay bassit.” Nalagipko iti dayta a kanito nga agpampanunot, “No kasapulan pay a patarnawen ti maysa a babai a kasta ti kasingpetna, kasanoak ngata?”

No adda pammatitayo ken ni Jesucristo, ti karigatan kasta met ti kalakaan a panawen iti biag ket mabalin a bendision. Iti amin a kasasaad makapagpilitayo iti rumbeng babaen ti pannarabay ti Espiritu. Adda kadatayo ti ebanghelio ni Jesucristo a mangsukog ken mangiwanwan iti biagtayo no pilientayo. Ken gapu kadagiti propeta nga agipaltiing kadatayo iti lugartayo iti plano ti pannakaisalakan, makapagbiagtayo nga addaan iti naan-anay a namnama ken natalna a rikna. Saan a nasken a mariknatayo nga agmaymaysatayo wenno saantayo a maipatpateg iti panagserbi iti Apo, gapu ta saan nga agpayso dayta. Mariknatayo ti ayat ti Dios. Inkari ti Mangisalakan kadagiti anghel iti makanigidtayo ken iti makanawantayo

tapno mangtarabay kadayo.<sup>10</sup> Ken kanayon a tungpalenna ti balikasna.

Paneknekak a sibibiag ti Dios nga Ama ket ti Ay-ayatenna nga Anak ti Mannubbottayo. Impatalged ti Espiritu Santo ti kinapudno daytoy a komperensia ket aramidennanto manen daytoy no kalikagumanyo daytoy, no denggenyo daytoy, no iti agangay adalenyo dagiti mensahe dagiti napusgan a katulongan ti Apo nga adda ditoy. Ni President Thomas S. Monson ti propeta iti intero a lubong. Bambantayanna-kayo ti Apo. Sibibiag ti Dios Ama. Ti

Ay-ayatenna nga Anak, ni Jesucristo, ti Mannubbottayo. Awan inggana ti ayatna. Paneknekak daytoy iti nagan ni Jesucristo, amen.

#### **DAGITI NAGADAWAN**

1. Spencer W. Kimball, "Give Me This Mountain," *Ensign*, Nov. 1979, 79.
2. Doktrina ken Katulagan 122:7–9.
3. Doktrina ken Katulagan 19:15–19.
4. Jeremias 8:22.
5. Josue 1:5.
6. Kitaen iti Thomas S. Monson, "Look to God and Live," *Ensign*, Mayo 1998, 52–54.
7. Ether 12:6–9.
8. Ether 12:18.
9. "I Know That My Redeemer Lives," *Hymns*, no. 136.
10. Kitaen iti Doktrina ken Katulagan 84:88.

© 2012 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/11. Pannakaanamongna a maipatarus: 6/11. Pannakaipatarus ti *Visiting Teaching Message, May 2012*. Ilokano. 10365 864